

遼史紀事本末諸論

全一冊

或人地事本無異

遼史紀事本末諸論序

遼禁本國人著作流傳境外故元修宋遼金三史獨遼
史較爲簡略於是清厲鶚氏采筆記小說詩文集諸書
關遼故者輯遼史拾遺廿四卷周春氏著遼詩話一卷
繆荃孫氏輯遼文存四卷王仁俊氏輯遼文萃四卷片
羽碎金掇拾殆盡矣然多薄物細故未有如南海譚先
生所輯紀事本末關係治亂興衰者甚大而命意所在
旣以資有國家者法戒亦足使猾夏蠻夷稍戢其野心
也譚先生少具著作才爲高要馮展雲先生高弟駢散
各體文刊於粵東各書院課藝者夙已不脛走四方嗣

以第二人進士及第旋典試江南所拔皆知名士若馮
夢華朱曼君輩未易悉數蔚芝唐先生尤其年最少者
也督學四川輶軒所採爲蜀秀集傳誦一時旣而簡放
滇中糧儲道則有于滇一集余絕喜其詩歌能於山厲
水刻處擅奇與其鄉先生宋芷灣厯官相似詩筆亦極
相似因專選其灘行諸作入近代詩鈔今復從唐先生
處得讀先生希古堂文甲乙集及紀事本末諸論甲集
皆散文沈博雅健實事求是不屑屑於昌黎之過抑半
山之拗折以爲工諸論則於遼一代治亂興衰之故原
原本本洞若觀火而比事屬詞皆用儷偶其數典之切

當極其自然非平日胸羅萬卷者能如此俯拾卽是歟
若其抑揚頓挫暢所欲言雖司馬子長班孟堅諸傳贊
亦不是過幾不覺其爲駢四儷六之作斯以難矣至於
論末造西遼猶能延禩八十拓地萬里由其祖宗威制
六合而無利中國之心雄踞一方而無殘生靈之意卽
宋仁宗之世四海樂安亦非遼之保境息民相與有成
不及此可謂一代之至言千秋之龜鑑矣世之窮兵黷
武以侵略爲政策者不可以憬然悟廢然返乎今譚先
生原書已佚惟存諸論余舊曾見遼史金史各有紀事
本末爲江西人李某所著未知其視譚書何如然此書

精華在論紀事特其糟粕補輯尙夫人而能之也侯官

陳衍序

遼史紀事本末諸論序

遼史紀事本末諸論爲南海譚叔裕先生遺著先生名
宗浚前清同治進士授編修回翔禁林於光緒間嘗典
江南鄉試吾邑唐蔚芝前輩出其門下爲所知賞睠師
門之舊誼把遺冊以嚮往而以

基博

粗治史學屬爲論

定曰太祖開國規模第一太祖諸弟謀逆第二人皇王
歸唐第三石晉立廢始末第四世宗卽位被弑第五穆
宗荒淫第六與宋連和第七聖宗善政第八高麗叛服
第九蕭后專政第十太叔重元謀逆第十一伊遜擅政
第十二西夏叛服第十三藩部叛服第十四遼亡第十

五西遼始末第十六凡十六篇而卒以自序歷寫諸篇
各敘其意則仿史公自序漢書敘傳之例遂不揣而序
於端昔唐劉知幾敘述史例以作史通首列六家總歸
二體一曰編年二曰紀傳古之史策編年而已司馬遷
作史記遂有紀傳一體然紀傳之法或一事而複見數
篇編年之法又一事而隔越數卷至宋袁樞以通鑑舊
文每事爲篇各排比其次第而詳敘其始終命曰紀事
本末則又於二體之外自命一格其後明陳邦瞻有宋
史紀事本末元史紀事本末清谷應泰有明史紀事本
末屬辭比事以續袁樞文省於紀傳事豁於編年於是

附庸蔚爲大國文章之道與時變通夫紀事本末所以
通紀傳之窮而紀傳昉自太史公限以篇終必有贊論
諸史因之一成不變然任氣倜儻解散辭體辨正然否
未有用對偶者獨唐修晉書出以儷辭爾遂爲史家所
不貴然稽其作者一時史官如令狐德棻等亡慮皆唐
代詞人研精晉故制句切響華實相扶而於抽黃對白
之中灝氣卷舒有縱橫之意健筆凌雲何減太史公論
贊哉而賤之也袁陳兩家爲紀事不綴論贊無亦據事
具文善惡自見紀傳之中亦有元史不始袁陳獨谷氏
爲明史紀事每一事訖各附論斷仿袁樞本末之體而

用太史贊論之法事出沈思義歸翰藻駢偶行文又依
晉書例不拘於尋常詞難繩以一律而遣詞抑揚隸事
精切敷述昭情善入史體曲折詳盡亦文章之絕足也
迄三百年未有繼軌獨先生此作融貫遼史自抒偉論
鼓其雄辭誇其儷事詞氣鏗訇極吞吐往復參差離合
之致錯綜以見意曲折以生姿英規勝範信足陵谷紀
而追晉書史家二體劉知幾之所論定以敘事言之也
而博則謂史家論贊亦有二體以行文言之也大抵太
史公書以散文晉書贊論以儷體散文滌暢易以盡意
而儷體拘攣病於不盡然史公頓挫往復言外見意獨

以不盡見含蓄而晉書跌宕昭彰妍裏發勁又以能盡
徵雄肆此在能者何所不可而目論之士必右史公先
生儷體行文無傷逸氣變化自如獨追高躅體大而思
精筆勢放縱所謂天下之奇作其中合者往往不減過
秦論浩浩落落良可誦也上元梅曾亮伯言少好爲駢
體文其友管同異之謂之曰使有孟荀莊周司馬遷之
意來如雲興聚如車屯則雖百徐庾之詞不足以盡其
一意然唐張燕公文章大筆獨稱庾信以爲筆涌江山
文驕雲雨下筆有神控物自富何病於雲興車屯而意
或有不慊觀於先生爲書詞惟閎麗遠眇史班獨宗徐

庾體閎而義密事核而詞達離合變化其文清嚴而工
篤磊落而多感槩然則來如雲興聚如車屯意之所到
而筆隨焉寧有所不足於先生之文哉陳氏爲紀事題
曰宋史而兼及遼金兩朝不以宋爲限斷先生撰次遼
紀未知視陳氏異同何如獨論則陳氏有未逮而讀姚
姬傳論文答徐季正書謂圈點啟發人意愈解說因爲
點定以發其意云時在中華人民造國之二十年十二
月二十四日無錫後學錢基博謹序

遼史紀事本末諸論

南海譚宗浚叔裕著

太祖開國規模

幽都之野潢河之地味甘渾酪俗習氍裘其性猛鷙其
人荒忽然而石槐勇悍東部歸懷捺鉢強梁南兒孝順
世產雄武亦其地土然也遼太祖崛起邊陲任惟裕悅
旣異匈奴賢王之款塞亦非離石都尉之將兵屬唐政
不綱中原鼎沸并吞八部綏輯諸蕃遂使東楛登庭西
環納賚服涼平朔懋拓宏圖游凱步元廣延英雋迹其
雄略亦有可稱者焉如任赫魯而寄以腹心重延徽而

俾司喉舌則用人之道得矣權鹽池而利轉輸置鐵冶而興鼓鑄則理財之道得矣頒國書以曉愚蒙之輩城皇都而重根本之圖則行政之道得矣析德喙部而散其驍強置舒新軍而收其精銳則治兵之道得矣至於軍旅之間不忘民事懲酷吏達冤民疏獄囚詢利病謁孔廟而躬奠醑圖直諫而廣旁求又幾幾乎與漢約三章唐成六典宏綱鉅製先後同符嗟夫冒頓控弦妄誅愛妾赫連蒸土屢殺匠人彼皆慘酷爲心凶橫成性如太祖者殆所謂九州之外五經之表獨有奇人者耶尤可異者天贊三年特降詔書經營兩事始征党項繼平

渤海類皆功成於不日謀決於先幾預剋師期炯如著
蔡意者管涔贈劍能知破敵之徵否則霍山授符早兆
興王之瑞不然者何以能妙操智略幽契神明若斯之
靈異也至涓欽后作配英主參贊帷幄形勢洞於鏡中
智術扣於囊底如毛后之彎弓躍馬克拒敵軍如婁妃
之運策決籌密襄大計巾幗房敖蓋所稀覩錄而存之
亦以見有遼開國規模之宏遠云

太祖諸弟謀逆

嗟乎余讀遼史至埒克諸人之事而歎遼之開基忠厚
也嘗考太祖自卽位後平奚霫取託歡定廬龍降烏古

天人之望允協圖籙之數攸歸彼埒克等膽怯同驕心
昏似鳴見秦皇車騎便欲覬覦建梁武旌旗罔知僭越
其時朝臣輯睦非有袁盎晁錯之謀也主德英明非有
博浪柏人之變也鄰封懾服更非有東甌閩越之援也
乃猶欲占星候變窺月生心競動天關爭迴地軸僨轅
小犢何足成大事哉旣乃奸謀敗露反水難收太祖篤
念友于宥其三死燒獄詞以安反側紆盤綬而被寵榮
謂宜鴈願北歸梟還東徙化其拊摑懷我好音任城以
廉謹自修衡陽以酣嬉免禍紫標黃膀擁彼厚貲碧袴
紅襦豔其舞服庶幾晚蓋能贖前愆顧復包藏禍心窺

竊神器鷹脫鞬而欲去狗獠索以思逃驅馳勝詭之徒
召集荆成之輩擁兵雁磧焚帳龍庭思同吳淠之逆謀
恥學荆英之贖罪以至鏃矛互鬪輦荻相攻矢及蕩陰
火焚雀桁吁何謬也設使太祖逞狼顧之威忘鵠原之
愛盡拘逆黨俾付爰書兵威極於六門塗炭窮於十宅
挖睛而戮江夏障面而誅晉安齊室諸王斧關見害秦
宗貴介囊木就刑檻羊安得久存穴鼠當令速死夫豈
得云刻急乎然且眷懷式好大度包荒罪止首謀餘皆
勿問眷茲同被之誼釋彼射鉤之嫌雖逆黨伊埒穆爾
等或生霾河軌或迫墜石崖射籀奇窮刑茲無赦而埒